

Kalaallit Nunaanni nunaqarfinni tamani ingerlatsinissamut akuersissuteqarfiullutik qulimiguulinnut mittarfinnik pilersitsinissamut, pioreersunillu aserfallatsaaliuinissamut, kingusinnerpaamik UKA2026-mut, Naalakkersuisut sanaartornissamut pilersaarusiornissaannut (projektering) peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens NapātôK', Naleraq)

(Siullermeerneqarnera)

Qujanaq Inatsisartunut ilaasortaq Jens NapātôK' siunnersuuteqarninnut.

Angallassineq teknikkimut ingerlasussasussanillu piareersaanermik aqutsinermillu tunngassuteqangilaq. Inunnut, toqqissisimanissamut assigiimmillu periarfissaqarnissamut tunngavoq. Nunami nunatsit ittumi, isorartuumi aammalu sila unammillernakkajuttumiittumi, pitsaasunik isumannaatsunillu angallassinissaq pingaaruteqarluinnarpoq nunaqarfinni inuuniarnermut.

Pakatsinerit paasilluarsinnaavagut, siunnersuuteqarnermut tunngaviusimasut. Nunaqarfinni arlalinni qulimiguulinnut mittarfeqangilaq imaluunniit pioreersut nutarternissaat pisariaqarlutik. Taakku kinguneraat, innuttaasut piffiit aalajangersimasut ilaanni angalanissamut, peqqinnissaqarfinnut aammalu inuiaqatigiinnut pingaarutilinnut allanut periarfissaqaratik innuttaasutut allatuulli. Assigiinnginneq ersarissoq, uparuassallugu pissutissaqartoq.

Taamatuttaaq aamma pingaartuuvoq qulakkiissallugu, isummernerit, ilisimasanik nutartikkanik qajannaatsumillu tunngaveqarnissaat. Naalakkersuisut tikkuarpaat, qulimiguulinnut mittarfiit pillugit 2022-imi nalunaarusiortoqareersimanera. Nalunaarutip pioreersup aammalu nutaanik pilersitsinissamut aningaasartuutaasinnaasutut naatsorsorneqarsimasut erseqqissarneqarlutik. Taassuma kingorna ineriartortoqarsimavoq piffinni arlaqartuni, taamaattumilluuna silatusaernerussasoq, taassuma nalunaarusiap nutarterneqarnissaa, ullutsinnut naleqquttumik piviusorsiortumillu pisariaqartitsinerit, periarfissat aningaasartassaalu paasiniassagatsigit.

Demokraatinut pingaarnersaavoq, nuna tamakkerlugu attaveqaasersuutitut assigiimmik periarfissaqartitsinissamik pilersitsinissaq. Innuttaasut nunaqarfinni najugaqarfimminniit aallarlutillu tikissinnaassapput isumannaatsumik pitsaasumillu, aammalu kikkulluunniit puigorneqartutut misigisimassanngillat. Tassungalugu ilutigalugu aaqqiissutit attanneqarsinnaasuussapput ungasissumut isigisut. Taamaattumik pitsaassaaq nunatsinni nutartikkanik paasissutissanik katersineq aallaavigigaanni, pisariaqartitsinerpaanut nukiit atorneqarnissaat siulliunniassagatsigu.

Naalakkersuisut allannguutissatut siunnersuutaata ajornartorsiut akisussaassusilimmik saqqummiuppaa.



Taamaaliornikkut periarfissinneqarpoq, ersarissunik tunngaveqarluni, suliniutini, immaqa pisariaqartitavinnik tunngaveqanngitsunik, tuaviupilugani isummernissaq.

Demokraatit pissutsit pitsaasuunissaannik, naapertuilluartunik periarfissaqarnissanik aammalu nunaqarfinni isorliunerusunilu, attaveqaasersuutit ulluinnarni pisariaqarlunnartinneqarneranik ukkatarineqarnissaannik kissaateqarneq.

Taamatut oqaaseqaateqarluta Naalakkersuisut allannguutissatut siunnersuutaata akuerineqarnissaa innersuussutigaaqput aammalu Sanaartornermut ataatsimiititaliami suliarineqaqqittussatut innersuussutigalugu.